

TEKS UCAPAN

BRIG. JEN. DATO' PROF. DR. KAMARUDIN HUSSIN

NAIB CANSELOR

UNIVERSITI MALAYSIA PERLIS

BERSEMPENA DENGAN MAJLIS AMBANG 2010 DI PUTRA
PALACE, PADA 31 DISEMBER 2009

Bismillah Hirrahman Nirrahim

Yang Berbahagia, Datuk Dr. Zulkefli Bin A. Hassan, Ketua Setiausaha Kementerian Pengajian Tinggi Malaysia,

Yang Berbahagia, Prof. Dr. Mohd. Fauzi Bin Hj. Ramlan, Pengarah Bahagian Hal Ehwal dan Pembangunan Pelajar, Jabatan Pengajian Tinggi Malaysia,

Yang Berbahagia Dr. Saharudin Bin Hj. Ismail, Setiausaha Bahagian Sukan Kementerian Pengajian Tinggi Malaysia,

Yang Berbahagia, Encik Yunos bin Abd Ghani Ketua Eksekutif Perbadanan Tabung Pendidikan Tinggi Nasional,

Yang Berbahagia Prof. Dr. Sazali Yaacob, Timbalan Naib Canselor (Akademik dan Antarabangsa),

Yang Berbahagia Prof. Dr. Zul Azhar Zahid Jamal, Timbalan Naib Canselor (Penyelidikan dan Inovasi),

Yang Berbahagia Prof Madya Mazelan Abdul. Hamid,
Pengurus Pasukan Bola Sepak UniMAP,

Pegawai-Pegawai Utama Universiti,
Dekan – Dekan Dan Ketua-Ketua Jabatan,
Para Pemain Bola Sepak UniMAP,
Seterusnya hadirin yang hormati sekalian,

**Assalamualaikum Warahmatullahi Taala Wabarakatuh Dan
Salam 1Malaysia.**

**Good Evening, Wan Shang Hao, Maalai Vanakam, Ma Sa An
Khair, Ra Thri Sawat.**

Talking Point;

- Bersyukur ke hadrat Allah Subbahau Wa Taala di atas limpah kurnia serta rezeki yang dicurahkan, kasih dan sayangNya mengizinkan kita semua hamba-nya dapat bersama-sama pada malam ini dalam Majlis Ambang 2010.
- Hanya tinggal beberapa jam sahaja lagi kita bakal meninggalkan tahun 2009 dengan pelbagai kenangan suka dan duka. Dan kenangan itu akan menjadi titik tolak dalam hidup kita untuk memperbaiki segala kekuranga pada tahun 2009 dan menjadikan 2010 lebih gemilang. Insyaallah. Marilah sama-sama kita bermuhasabah diri agar segala kekurangan pada tahun ini dapat di atasi.
- Walaupun baru tujuh tahun penubuhan UniMAP yang dahulunya dikenali sebagai Kolej Universiti Kejuruteraan Utara Malaysia (KUKUM), pelbagai kejayaan telah ditempa pada tahun 2009 ini, bukan sahaja dalam bidang akademik tetapi juga dalam bidang penyelidikan, antarabangsa serta sukan.
- Menyingkap kejayaan UniMAP dalam bidang akademik, pada tahun ini UniMAP buat pertama kalinya menawarkan dua pengajian baru yang bukan dalam bidang kejuruteraan iaitu Perniagaan Antarabangsa dan

Keusahawanan Kejuruteraan. Manakala satu lagi program baru adalah Kejuruteraan Rangkaian Komputer. Dengan penambahan tiga pengajian baru itu menjadikan keseluruhan pengajian yang ditawarkan di UniMAP di peringkat ijazah adalah sebanyak 22 program, dan diploma sebanyak 6 program.

Hadirin dan hadirat sekalian,

- Pada 13 Mei lalu, UniMAP melakar sejarah apabila Stesen Penyelidikan Agroteknologi UniMAP di Sungai Chuchoh telah dirasmikan oleh Raja Perlis, Tuanku Syed Sirajuddin Putra Jamalullail. Pembangunan kampus ini hasil Plan Strategik UniMAP berkonsepkan intergrasi pendidikan dan latihan disiplin pertanian dengan sokongan beberapa kelompok disiplin kejuruteraan yang sudah wujudkan di UniMAP. Dengan keluasan 250 hektar, stesen penyelidikan itu turut berperanan untuk menjalankan kajian dan penyelidikan dalam meningkatkan sektor pertanian di Perlis termasuk meningkatkan kualiti mempelam Harumanis.
- Selain itu, tahun ini juga UniMAP telah mengorak langkah menerokai bidang aeroangkasa melalui kejayaan menghasilkan “Attitude Control System” untuk satelit mikro InnoSAT yang dibangunkan oleh Astronautics Technology Sdn. Bhd. (ATSB). Sistem berkenaan akan

berfungsi untuk mengawal kedudukan satelit di orbit agar bergerak dalam paksi yang betul.

- Kejayaan sistem ini diterima pakai setelah mendapat kelulusan dari pihak yang menilai di Amerika Syarikat membuktikan keupayaan UniMAP meskipun tidak mempunyai pusat pengajian khusus dalam bidang aeroangkasa. Prof. Dr. Sazali Yaacob telah dilantik sebagai Ketua Penyelidik UniMAP untuk sistem berkenaan.
- Pada Julai lalu, Menurut laporan yang dieluarkan oleh “The Webometrics Ranking of World Universities” , UniMAP telah menduduki carta ke-14 di antara universiti di seluruh Asia Tenggara manakala carta ke-745 bagi universiti seluruh dunia. Kedudukan UniMAP merupakan yang ke-3 tertinggi di kalangan universiti dari Malaysia, di dahului oleh UTM dan USM. Penilaian ini dibuat berdasarkan pelbagai kriteria yang telah ditetapkan. Kriteria-kriteria tersebut perlu ada pada laman web sesebuah universiti bagi memastikan ranking terbaik diperolehi.
- Sementara itu pada September lalu, Malaysia Government Portals and Website Assessment (MGPWA 2009) yang diselenggarakan Multimedia Development Corporation (MDeC) turut mengisytiharkan Laman web

rasmi UniMAP berada di tangga kelima dari 1,192 laman web yang dinilai di seluruh Malaysia pada tahun 2009.

- Sekalung tahniah diucapkan kepada Pusat ICT UniMAP amnya dan kepada pasukan laman web UniMAP khususnya yang telah bertungkus-lumus mengerah fikiran bagi mendapatkan rekaan laman web UniMAP yang diiktiraf dunia. Pencapaian ini membuktikan universiti yang baru berusia tujuh tahun ini tidak ketinggalan dalam bidang teknologi maklumat, malahan mampu bergerak seiring bersama universiti-universiti yang lebih senior.

Hadirin yang dikasihi sekalian,

- Saya sebagai Naib Canselor UniMAP amat berterima kasih dan berbangga kerana walaupun UniMAP baru berusia setahun jagung, namun pihak industri serta universiti-universiti antarabangsa memberi kepercayaan yang begitu tinggi untuk sama-sama menjalinkan hubungan dua hala dengan mengadakan pelbagai memorandum persefahaman (MoU) dan memorandum perjanjian (MoA).
- Setakat tahun ini sahaja UniMAP telah menandatangani 9 MoU dengan pihak industri dan universiti tempatan, 16 MoU dengan universiti antarabangsa dan 2 MoA. Antaranya adalah menandatangani MoU dengan

universiti-universiti di Uzbekistan, institusi pengajian tinggi di Krygstan, Universiti Teknologi dan Sains Kunming, China serta lain-lain universiti lagi. Ini bertujuan menjalankan kerjasama dalam bidang akademik dan penyelidikan melalui pertukaran pelajar serta kakitangan akademik selain memperluaskan jaringan hubungan UniMAP di peringkat antarabangsa.

- UniMAP juga menandatangani MoU dan MoA dengan syarikat perkhidmatan minyak dan gas Romstar Sdn Bhd (Romstar), MIMOS Bhd, Akhbar Utusan Malaysia, Jabatan Pertanian Negeri Perlis, Significant Technologies Sdn. Bhd., Saham Utama Sdn. Bhd. dan pelbagai lagi industri dalam langkah mengukuhkan hubungan baik antara industri.

Hadirin yang saya kasihi sekalian,

- Dalam bidang penyelidikan, saya amat berpuas hati dengan para penyelidik dan para pelajar kita yang sentiasa konsisten dan peka untuk menghasilkan produk-produk penyelidikan terkini dalam usaha mengembangkan bidang penyelidikan di UniMAP. Mereka bukan sahaja mencipta produk malahan bersedia untuk menyertai pertandingan yang dianjurkan tidak kiralah di peringkat nasional mahupun antarabangsa.

- Antara kejayaan yang diperolehi adalah, pada Pertandingan Reka cipta dan Inovasi Kebangsaan (NRIC) 2009 yang berlangsung Mei lalu di Universiti Sains Malaysia. UniMAP memperoleh dua emas, dua perak dan tiga gangsa sekaligus meletakkan UniMAP di tempat kedua di belakang Universiti Teknologi Malaysia. Dua daripada produk ciptaan pelajar meraih anugerah khas Moto Intention Award dan Best Invention & Innovation Award sumbangan Motorola.
- Pada International Invention, Innovation, Industrial Design & Technology Exhibition 2009 (ITEX) kali ke-20 yang berlangsung di Kuala Lumpur Mei lalu, UniMAP mencatatkan kejayaan membanggakan dengan mengumpul 39 pingat keseluruhan iaitu 9 emas, 17 perak dan 9 gangsa. UniMAP berjaya menduduki tempat kedua dari aspek pungutan emas tertinggi selepas Universiti Kebangsaan Malaysia (UKM).
- Di Eksspo Penyelidikan Dan Ciptaan (Pecipta) Institusi Pengajian Tinggi Antarabangsa 2009 Oktober lalu, UniMAP menduduki tempat ke enam daripada 23 universiti yang masuk bertanding dengan merangkul dua pingat emas, sepuluh perak dan tiga gangsa.
- November lalu, pada Persidangan dan Pameran BioMalaysia 2009 yang berlangsung di Kuala Lumpur

Convention Centre (KLCC), UniMAP meraih 10 pingat iaitu satu emas, tiga perak dan enam gangsa.

- Dan baru-baru ini di SIIF 2009 yang berlangsung pada 3 sehingga 7 Disember 2009, bertempat di Pacific Hall, COEX Seoul, Korea Selatan. Empat produk penyelidikan telah dipertandingkan. Hasilnya kita telah berjaya memenangi satu perak dan satu gangsa.

Hadirin hadirat sekalian,

- Sementara itu, pada tahun ini juga lanskap pengajian UniMAP telah berubah setelah menerima kemasukan pelajar antarabangsa dari pelbagai negara. Pada Julai lalu seramai 26 pelajar dari China, 31 dari Yemen, enam dari Indonesia, Seorang dari Sudan dan seorang dari Mauritius telah berdaftar untuk Undergraduate program.
- Manakala pada November lalu, kita baru menerima kemasukan para pelajar dari China sebanyak 25 orang, Indonesia 10 orang, Seorang dari Iraq, sepuluh orang dari Somalia, lapan orang dari Yemen dan masing-masing seorang dari Sudan dan Syria. Kesemua mereka ini mengikuti kursus bahasa inggeris intensif sidang akademik 2009/2010 sebelum melanjutkan pengajian mereka di UniMAP.

- Walaupun UniMAP merupakan universiti kejuruteraan, namun tidak ketinggalan dengan pelbagai kejayaan dalam bidang sukan yang kita telah perolehi. Antaranya adalah, pada kejohanan dwitahunan Sukan Badan Berkanun Malaysia ke 6, di Stadium Langkawi, 28 April hingga 3 Mei lalu, UniMAP telah membuktikan kehebatannya dengan menduduki tangga ke empat keseluruhan daripada 58 agensi badan berkanun yang mengambil bahagian. Selain itu, UniMAP turut muncul juara pertandingan bola sepak sembilan sepasukan apabila menewaskan Lembaga Kemajuan Pertanian Kemubu (KADA) 2 – 0.
- Dan yang terbaru sekali pada Isnin lalu, kita telah menempah satu lagi detik bersejarah apabila pasukan bola sepak UniMAP yang mewakili pasukan Perlis melayakkan diri ke perlawanan akhir Kejohanan Piala Emas Raja-Raja 2009 menentang Kedah malam Isnin lalu di Stadium Darul Aman. Dan dengan semangat berpasukan yang tinggi serta komitmen yang ditunjukkan oleh para pemain serta pihak pengurusan, pasukan Perlis berjaya menewaskan Kedah dengan jaringan 2 – 0 sekaligus menjadi juara Piala Emas Raja-Raja 2009. Tahniah dan syabas saya ucapkan.

Hadirin sekalian,

- Hanya tinggal beberapa jam lagi untuk kita mengucapkan selamat tinggal kepada tahun 2009 dan selamat datang kepada tahun 2010. Justeru itu saya berharap segala kejayaan yang dikehendaki tahun ini akan dijadikan inspirasi untuk kita terus memburu kejayaan pada tahun 2010.
- Selaras dengan semangat Tahun Baru marilah kita semua mempertingkatkan azam untuk membawa UniMAP ke mercu kejayaan yang lebih tinggi. Insya-Allah dengan usaha yang lebih gigih, dan disiplin yang tinggi serta dengan berpegang kepada nilai-nilai hidup yang murni, kita akan mencapai kejayaan yang lebih cemerlang pada tahun hadapan.

22. Akhir kata saya ucapkan Selamat Menyambut Tahun Baru 2010. Semoga tahun 2010 akan merupakan satu lagi tahun yang cemerlang bagi kita semua.

Sekian,

Wabillahitaufik walhidayah wassalamualaikum
warahmattullahi wabarakatuh.